

四庫全書

史部

欽定四庫全書

唐大詔令集卷六十八

宋 宋敏求 編

典禮

南郊二

貞觀十七年南郊德音

景龍三年南郊赦

開元十一年南郊赦

天寶六載南郊赦

闕

天寶十載南郊赦

南郊二

貞觀十七年南郊德音

朕嗣宗祧夙夜寅畏憂勤在於政道撫育遍於含生十
七載於茲矣上玄儲祉貞石表瑞朕式修禋燎躬謝蒼
昊逮於儲兩亦申虔奉朔風既切飛雪載零及登泰壇
六合開朗神祇介福豈獨在予和樂之慶宜備率土可

賜三日酺自漢魏以來或賜牛酒牛之為用耕稼所資多以宰殺深乖惻隱其男子七十以上量給酒米麵梁州管內大辟罪以下見禁囚皇太子慮過諸州並遣使人分往唯十惡不在慮限餘皆量情降宥焉

景龍三年南郊赦

朕聞禘神配祖昊穹著其成命就陰即陽墳典明其大節故豺獮有祭下不隔於微品犧牲必陳上以光於嚴配軒皇用事則雍旁五祠漢帝潔齋則城南七里固能

使敬而不黷求而不匱我高祖神堯皇帝開階立極配
永循機太宗文武聖皇帝仗金策而清四方運璇璣而
齊七政高祖天皇大帝與乾坤合其德與日月合其明
則天大聖后建補天立極之功受河圖洛書之統五精
歸運四葉重光朕虔順樂推欽承睠命紹宏基於累聖
日慎斯兢執大象於羣生夙興如厲遠人殊俗占風而
集靈邸美瑞休符繫日而輝史筆故得三邊靜柝五兵銷
刃寰宇大寧人神式序而德慚被物誠謝格天水旱尚

臻政刑猶舛永以憂惕無忘鑒昧然則事天事地莫盛
乎禋祀弗躬弗親孰申乎誠敬朕自臨四海於今六年
幸承祧社之靈未展郊丘之謁方今朔風候律南畝登
辰乘上日而恭饗奉高禋而肅事備殷薦之文行昭報
之禮豈唯光靈所燭俱驗其徵方異後先不違實受其
福至若五刑之屬十惡為重自頃恩赦罕聞該及朕以
眇身膺乎大寶下人不足每切如予之傷上帝所臨敢
逃在予之責間居三月未弭厥憊靜念終朝載增寅畏

侑神伊始與物惟新思崇曠蕩之恩以答高明之貺可
大赦天下繫囚見徒及十惡咸赦除之雜犯流入並放
還京文武官及應禁考使別勅陪位官邊州都督刺史
諸軍大使副使三品以上賜爵一等四品以上加一級
入三品者三品減四考五品減三考聽入外文武有官
賜勲一轉關內諸州無出今年地稅令內五品以上各
舉堪任州刺史縣令者天下大酺三日

景龍三年十一月二十二日

開元十一年南郊赦

門下朕獲主三靈於今一紀聽政中昃每不敢康觀書
乙夜將求諸道頻年已來每思至理或遠人不率或嗣歲
不登淳朴未還惕厲斯在為人上而慚德奉天明以畏
威故祝史正辭必期於陳信郊丘備禮將俟於昇平今
宗廟降靈克開厥後乾坤交泰保合太和麟鳳龜龍玄
符黃瑞之祉蠻夷戎狄梯山航海之琛莫不日月以聞
道路相屬顧惟不德承茲休運欽若昭報疇咨故實所
以今年獻春恭祀后土季秋吉日追崇九廟採先後於

魯經稽肆類於虞典爰因長至欽謁上玄告受命之元
符昭嚴配之成績大典云備至誠克展諸侯駿奔來於
穆之相百神受職率咸秩之文六變已陳三獻斯畢蓋
春秋大用莫先乎祀王者盛禮莫重於郊柴燎克終感慶
罔極豈予一人之福亦爾萬邦之賴宜因咸和之際俾
承厚下之澤可大赦天下自開元十一年十一月十六
日昧爽以前罪無輕重已發覺未發覺已結正未結正
繫囚見徒大辟罪以下咸赦除之其十惡死罪造偽頭

首刼賊殺財主不在赦例就中仍慮有冤濫者所司具狀送中書門下盡理詳覆奏聞朕將親覽其有亡命山澤挾藏軍器百日不首復罪如初敢以赦前事相告言者以其罪罪之昇壇行事官及供奉官三品以上賜爵一級四品以下加一階諸獻官並准昇壇例内外文武官及致仕并前資陪位者賜勲一轉緣大禮有職掌押當者更加一階齋卽並與出身皇親諸親陪位未嘗者並放選已出身者賜勲一轉親王公主各與一子官三衛

監門黃衣長上飛騎萬騎校內雜色人在齋宮宿衛及諸色有資勞人緣大禮有職掌并流外行署預見大禮者亦賜勲一轉其充香爐執扇及禮生祝史贊者賜勲外簡選日優與處分兵士宿衛齋宮并諸色無資勞緣大禮有職掌及京兆府百姓緣南郊祇應者各免其家一年雜科差南北衛將軍率中郎將宿衛齋宮者並同昇壇例其諸軍節度大使及三都留守雖不陪位委寄既重特宜同昇壇官例百歲老人賜綿帛五段粟五

石縣令至其家存問給付孝子順孫義夫節婦旌表門閭終身勿事諸州百姓或因逢水旱流寓未安者宜令所司輿集使即作賑恤安輯法奏聞其單貧衛士番鎮久次令州府長官簡擇灼然者放免番役征行人家州縣檢校勿使侵欺磧西鎮人途路懸遠者特宜賜勲轉鰥寡惇獨亦令州縣矜恤使得存濟元置義倉救人不足承前貸百姓糧及種子未納者並放免不得却徵自古聖帝明王忠臣烈士名山大川並令所管致祭其已得替官人並轉累奏得處分非老弱



疾病猶堪處事量加收錄使免失職其左貶官非逆人五服內親及犯贓賄名教者所司勘實奏聞量移近處其官人有清白政術堪任刺史縣令及抱器懷才不求聞達者州長具以名薦宗室中有孝悌才術為衆所知仍在俾任者委宗正具以名奏君臣一體休戚共焉朕今承天命恭傳大寶蓋憑累祖餘業得一之符亦由羣公舊勲不二之力永言繫賴其敢忘之自武德以來實封功臣知政宰輔有身無大故而亡官失封子孫淪屈所由勘實具以狀聞

存者可籌其官榮逝者當錄其胤嗣使幽明同慶知有令
辰亞獻邠王守禮終獻官寧王憲各賜物一千段捧俎申王
撫夷侍岐王範薛王業各賜物七百足侍中源乾曜中書令
張說兵部尚書同中書門下三品王駿各賜物五百足正衣
附馬都尉王守一王繇溫曦宗正少卿崔澄各賜物三百足
二王後賜物一百五十足壇場使京兆尹孟溫禮賜物二百
足修造羽儀使賜物一百足修撰儀注官五品以上賜物百
足六品以上賜物七十段自餘陪位預宴官一品賜物一百足

二品三品八十疋四品五品六十疋七品四十疋八品九品三十疋鴻臚諸蕃等使與見大禮及在本蕃王侯大酋長同宴會例給賜郡主縣主各賜物八十疋緣大禮數處有職長者任於一頭從高叙天下州府賜酺三日京城五日前任所在百姓村坊宴樂不得科率聚斂其有處分未該者令所司及本使比類奏聞赦書曰行五百里主者施行

天寶十載南郊赦

皇天眷命必順於五行哲后馭時實遵於三統考古之

道何莫由斯朕欽若上玄嗣守丕業察璿衡以齊政念
稼穡以勸人日慎一日四十載於茲矣何嘗不夙夜祇
畏憂勞在懷思康黎元臻夫至理幸以刑理俗阜天成
地平萬方底寧羣物咸遂雖慙大化且謂小康皆至道
儲社宗社敷佑豈予菲薄而克致焉然則上稽歷象旁
採輿議爰以上位承漢火行是憑大易之辭用紹前王
之烈禎祥累應正閏攸分不改舊章惟新景運屬歲初
吉乘時布和是命展祀崇禋竭誠昭報庶叶發生之序

載覃雨露之澤可大赦天下自天寶十載正月十日昧
與以前大辟罪以下罪無輕重已發覺未發覺已結正
未結正繫囚見徒常赦所不免者咸赦除之其左降官
及流移配隸安置罰鎮効力之類並稍量移近處其官
已復資至叙用之日不須為累其流人配隸并一房家
口者所犯人情非切害身已亡沒家口放還流人及左
降官考滿載滿丁憂服滿者亦准例稍興量移其亡官
失爵放還不齒及諸色放停解考免與替人等非犯賊

唐大詔令集卷六十八

欽定四庫全書

唐大詔令集卷六十九

宋 宋敏求 編

典禮

南郊三

乾元元年南郊赦

元年建卯月南郊赦

廣德二年南郊赦

貞元元年南郊大赦天下制

南郊三

乾元元年南郊赦

門下朕聞皇天有命皇王受之命之為君孝理為本莫
不欽崇前列聿修禘享之儀對越上玄式展禋郊之禮
故美其盛德商頌有奏鼓之音告厥成功夏書有錫珪
之慶國之大事實在於斯間者逆寇亂常暴殄天物毀圖
書禮樂或阻於干戈宗廟神祇有虧於享祀朕誕受畀

恭行大罰羣光克殄討鯨鯢以示威王室既寧奉饗輿
而載復太上聖皇大帝功格天地道邁胥庭思凝神於姑
射將釋責於宸扆予小子繼承大統夙夜祇懼俯盡臣
子之心親親尊尊庶極於此是用追崇先后建立中宮
永言孝感恩徽音於文母使行婦道想墜降於虞嬪情
理於是獲申人倫以之攸叙然後執瓚清廟歌五聖之
重光燭柴圓丘覩百神之受職復修祭禮再備樂章尊祖
配天不失舊物今大禮斯舉玄符允答行慶施惠尚薦

於陽和出繫挺囚必當於時令恩與天下更布惟新宜
覃肆眚之恩以洽雍熙之化可大赦天下除反逆支黨
緣坐十惡謀殺劫盜臨監主守自餘一切原免其與逆
賊元謀及脅從今但歸投並原其罪仍與官資其成都
府元從聖皇功臣及靈武元從功臣并收兩京將士三
京留守諸道節度採訪使普恩外三品以上賜爵一級
四品以下加一階行人賜勲三轉自寇賊以來官吏百
姓有申勞未經酬賞者委所在長官具狀聞奏黨甄錄

天下百姓除正租庸外一切不得別役如緣軍務所要
自今和市兵士尪弱羸老並揀釋放其長安萬年兩縣
各借一萬貫每月收利以充和雇其別勒索物及供諸
司並蕃客等左藏雖給價直奏請每引時月宜先給兩縣
各五千貫貯於兩市差官專知旋還價直其州縣門夫
勲官並於舊額數減一半其庸丁殘疾人等不須更差
其州縣官新上物件並以公廨及官人料錢依時價和
雇造買不得分配典正其年支口味宜減一半諸使應

進鷹鵠狗豹豹等一切並停應緣南郊百司張設有損
百姓苗稼者委京兆尹隨損多少陪酬所損錢物即便
聞奏百姓中有能行仁義分濟貧窮免填溝壑賴救恤
者具名聞奏當寵以官秩鰥寡惇獨篤疾不能自存及
陣亡人家并損免戶州縣隨事優恤賑給百姓中有事
親不孝別籍異財黷汚風俗虧敗名教先決六十配隸
磧西有官品者禁身奏聞京官九品以上許封事極言
時政得失朕將親鑒用佇嘉謀才有可觀時當叙錄草澤

及卑位之間有不求聞達未經推薦者有一藝以上恐遺俊又令兵部吏部作徵召條目奏聞其錄事叅軍職司糾舉自今以後宜升判司一政以彰委任國子監學生明經明法帖策口試各藝並能通四以上進士通三典及第鄉貢明經准常式州縣學士放歸營農待賊平之後任依常式二王三恪各與一子官内外文武三品以上賜一級四品以上加一階

四月十四日

元年建卯月南郊赦

門下惟天為大事之在明惟聖能享承之在德朕託於
人上獲守丕圖思大道之行去鴻名之飾文武徽號存
而不稱開統履端建元叶紀美皆有讓言必可陳虔告
玄元致齋清廟恭行舊典展禮南郊百神允懷上帝臨
我升聞之際其亦何言昭事而誠實應多福高而不遠
復見其心乃候發生之時用行嚮勸之道暘谷出日登
大明於域中泰山起雲徧膏澤於天下君人臨照德澤
周合布其寬大豈止於茲宜弘肆眚之恩益廣萬邦之

慶可大赦天下自元年建卯月一日昧爽以前大辟罪以下罪無輕重已發覺未發覺已結正未結正見禁囚徒常赦所不免者咸赦除之其叛逆造偽頭首者謀殺故殺并十惡死罪官吏及典正犯賊為蠹既深在法難容並不在赦限其史朝義下脅從將士及受偽官等棄逆歸順因事立功封賞之外餘無所問其諸色流人及左降官等前後頻有處分並與量移所由稽遲動歷年序宜令有司申明前後制勅節文速勘責類例聞奏其中

有行業夙著情狀可矜久踐朝班曾經任用者委在朝
五品以上清望官及郎官御史於流貶人中素相諳委
為衆所推者各以名薦須當才實其内外文武官三品
以上賜爵一級四品以上各加一階成都靈武元從功
臣三品以上更賜爵一級四品以下各加一階朕敬授
人時慎徽月令庶無否極以獲休徵自今以後每至四
孟月迎氣之日與百辟卿士舉而行之建辰月應菑殲
騎宜三分量留一分其餘放歸營農至建巳月任依常

式諸州刺史縣令及有司叅軍令設法勸課令其耕種
不得失時貧不支濟戶仍方圓處置量事借貸務令成
立歲終巡按量其功效便申賞罰諸道貢獻除馬畜供
軍之外其餘鷹鷂豹奇禽異獸並不得輒進五都之號
其來自久宜以京兆府為上都河南府為東都鳳翔府
為西都江陵府為南都太原府為北都孝本天經禮崇
國典橫於四海漏及三泉其京清資正員文官五品以
上并兩省供奉官御史諸州刺史諸道節度使三品以

上父亡母歿未曾追贈者量與追贈文武不墜道弘於人務在搜揚俾其展效其諸道入中有詞學高深兼通政理軍謀制勝明習韜鈴者委所在刺史揀擇聞薦京官四品以上正員文武官任各舉一人孝子順孫義夫節婦旌表門閭終身勿事

廣德二年南郊赦

惟我高祖太宗之有邦罔不昭事於上帝嚴恭寅畏與神合符七聖在天眷命永固朕嗣守鴻業敢忘奉先尚

質貴誠聿修盛典頃以四方多難責在朕躬建侯行師
日不暇給東擒羯胡之首西禦犬戎之患元元告病社
稷阡危內定外攘不遑展禮雖高明未達而精意惟勤克通至
誠以錫純嘏蕃夷即叙弓矢載橐虔奉泰壇鑒昧接神
祇之顧永懷宗祏歲時結霜露之思近又百辟在庭儼
然而進奉請元予以居少陽冊命乃行七芑攸主按風
雨之清道乘星火之仲春朝於玄元格於藝祖躬執圭
眞祇見南郊天何言哉神所勞矣敷兆人之馘穀廣四

達之聰明式重燔柴之經益申解網之惠可大赦天下
自廣德二年二月二十一日昧爽以前大辟罪以下罪
無輕重已發覺未發覺已結正未結正繫囚見徒常赦
所不免者咸赦除之左降官即與量移近處亡官失爵
放歸不齒之類并已復資未得本階者各量與收叙諸
色流人及量移人并罰鎮効力配隸等一切放還自克
孽亂常王室多故干戈不息今已十年軍國務繁闕輔
尤劇念茲疲耗久困征科其京城諸司使應配驢騎官

散官諸色工匠幕士供膳音聲人執祭齋郎閤事掌閑
魚師并諸司門僕京兆府驛丁屯丁諸色納資人每月
總八萬四千五十八人數內宜每月共支二千九百四
十四人仍令河東關內諸州府掣得偏出京兆府餘八
萬一千一百一十四人並停所須衛役使宜樽節定數
官給資錢不得干擾百姓其實應元年十二月三十日
以前諸色人逋欠在百姓腹內者并宜放免天下戶口
宜委刺史縣令據見在實戶量貧富作等第差科不得

依舊籍帳據其虛額攤及鄰保其天下諸州府長官及縣令有清白著聞善政最能招緝逃亡編附復業戶口增多者具狀聞奏朕當差人按覆與所舉狀同者超資進改天下所有諸色結聚及羗渾党項等能悔過自陳各歸正業一切並捨其罪其中有能率衆先來者仍特加官賞征人不息勤戍斯久丁壯疲弊老弱困窮光武有言頭髮為白故戢藏鋒刃牧養元元凡方面重臣宜悉朕意應諸州團練將士等委本道節度使及都防禦使

等審與州府商量如地非要害無所防虞其團練人等
放營農休息寇戎以來積有年歲征求數廣凋弊轉深
自今以後除正租稅及正闕并度支符外餘一切

不在征科限內文武官三品以上賜爵一級四品以下
各賜加一階仍賜勲兩轉武德唐元功臣勲業特崇子
孫沉翳所司勘責各與一人官成都靈武元從普恩之
外三品以上更賜一級四品以下更加一階寶應功臣
普恩之外三品以上各與一子六品官賜爵一級四品

以下各加兩階更賜勲兩轉五品以上官子爲父後者
賜勲兩轉副元帥光弼子儀各與一子五品官並階諸
道節度使各與一子五品官并階都防禦使經畧等使
各與一子六品官並階去歲行幸陝州六軍英武威遠武
寶應射生左右步軍等并内外文武百官扈從到行在
者三品以上與一子官四品以上各加兩階自陝州至
上都以來置頓使及州府官普恩外各與一子出身置
頓使判官已緣路縣令及專知頓官各加一階其六軍

神策寶應射生衙前在生及左右步軍英武威遠威武等諸左右金吾將士緣大禮扈從及在城留後者共賜錢五萬貫鴻臚蕃客共賜錢一千貫文儀王及彭王以下諸王男未有官者並准舊例與官其已封為郡王國公者永穆長樂以下長公主及諸縣郡王并嗣王郡王各與一子官皇親五等以上諸親三等以上各與一子出身二王之後各與一子官臺省之官事資履歷刺史縣令任在親人職務所更是為理本其左右丞侍郎御

史中丞等取曾任刺史者卽官亦取曾任縣令者并所
選御史亦宜於錄事叅軍縣令中簡揀仍須資歷稍深
者其有官非累歷才行特堪任用者自布衣以上任所
聞薦委中書門下尚書省考試堪任者不在此限尚書
省理政所繫左右丞綱轄攸歸比來百司職事皆廢宜
令明徵式令各舉所職百司有論時政得失並任指陳
事實具狀進封必宜切直無諱有司白身人亦宜准此
任匭使進表朕將親覽必加擇用朕每思素儉敦以淳

風必約嚴章以齊侈俗其珠玉器珍寶細雜綉等一切
禁斷諸道攝官頻有處分一切盡停尚聞因循其弊未
革即宜申明舊勅勒停三年之喪謂之達禮自非金革
不可從權其文官自今以後並許終制一切不得輒有
奏請緣大理應陞壇殿行事者普恩外更與一子官應
在太清宮郊廟諸色職掌者及封皇太子行事官撰冊
并書冊文及檢校造冊官普恩之外三品以上賜爵一
級四品以上加一階仍賜勲一轉天下侍老九十以上

板授刺史七十以上板授上佐縣令孝子順孫義夫節婦旌表門閭終身勿事五岳四瀆名山大川自古聖帝明王忠臣義士宜令所管致祭

貞元元年南郊大赦天下制

陸贄

門下君天下者受命於天地繼業於祖宗致其誠心惟敬與孝失敬莫大於廢祀虧孝莫大於黷神朕以眇身屬承大統縱欲敗度浸生厲階兵連禍深變起都邑六師播蕩九服震驚郊廟園陵陷於克逆神人之主將追

周星列聖之業幾墜於地遺敬虧孝罪由朕躬撫臨萬
邦甚用自愧側身思咎庶補將來股肱元臣比義叶德
爪牙衆士戮力同心誅大憝而京邑廓清剪逋寇而關
河底定茲朕再與王公卿尹洎億兆之人備其盛容條
具物禮薦誠清廟展敬圓丘陳謝罪懋告情雪耻感慕
慚惕若無所容上帝顧懷再新景命豈伊匪德獨被鴻
休思與普天誕膺多福可大赦天下自本年十一月十
一日昧爽以前

云

李希烈背逆不道情所難容朕憫念蒼

生務思征討頻有詔命許其自新若能歸降依前待之以不死淮西管內將士官吏百姓等一切原宥與之如故官封亦皆復舊如能特建功効者當別抽擢若家口親屬在諸道者長吏撫綏各使安集其歸順百姓仍委節度觀察刺史給空閒地任便安居優復終身矜全濟大事平已聽歸本貫云自頃克渠倡亂逆將附姦保據國都憑陵旬服出次郊邑再遷巴梁險阻艱難靡不經歷暴亂之後乃彰烈士之功憂危之中方見直臣之

節進善錄勲其可弭忘應奉天興元元年元從立功并收京城將士食封者各隨文武與一子官餘並加兩階仍賜勲兩轉其文武百官應扈從到興元府者五品以上賜爵一級六品以下加一階自建中四年以來歿身王事義烈著明未經褒贈者本道即具名銜事蹟聞奏諸道有辭退官健州府長吏切務安存仍量以空閑田地給付免其差役任自營生社稷之勲以輔興王業統帥之任以總制戎麾職弼諧者其德崇授旌節者其

功大方鎮乃國之垣翰禁衛實予之爪牙尹京實賴於肅清主計尤資於辦集所頒慶澤宜越常倫司徒兼中書令晟宜與一子五品正員官并四品階諸道副元帥各與一子五品正員官都統與一子六品正員官中書門下平章事充節度使各與一子七品正員官節度使及神策兵馬使六軍統軍金吾六軍大將軍判度支侍郎各與一子八品正員官都團練都防禦使京兆河北尹金吾大將軍殿前兵馬使各與一子九品正員官多

難以來三十餘載克平禍亂屬在戎臣或節著艱難勲
高戰伐受任雖專於將帥成功亦賴於羣材懋賞推恩
宜加脣嗣諸道大將功業崇高者各與一子官本使即
詳定錄名奏副元帥都統兼節度使下每道共三十人
節度使下每二十人都團練都防禦使下各十人如大
將軍子孫之中有藝業優長性行純確者本道使具狀
聞薦仍量事資給令赴上都朕獲隨材授官以充侍衛
庶使功臣之後與國無窮故尚父子儀先朝元勲再復

京邑贈大尉秀實以死為國節冠古今宜與子孫一人
五品正員官自至德以後節度大將忠烈功績著明其
後淪翳者所司即條錄聞奏與子孫一人正員官諸色
人中應在賊中潛奉神主頃已甄賞宜賜優崇

云

江

淮運使檢校左僕射同中書門下平章事韓滉勵精勤
節夙夜在公漕輓資儲千里相繼事無憊素人不告勞
拯於克災厥有成績可進封晉國公關畿之內連歲興
戎荐屬天災稼穡不稔穀糴翔貴蒸黎困窮倉廩空虛

莫之賑贍每一興念憫然痛心宜支度取江西湖南見
運到襄州米十五萬石設法般赴上都以救百姓荒饉
如山路險阻運輓難通仍召貧人令其般運以米充脚
價務令全活流庸庶事優饒副朕勤恤立國之道始於
親親所以厚骨肉之恩明教化之本況荐經難故宗族
漂淪敦睦之情有加常日大長公主長公主公主各與
一子七品官嗣主郡主縣主各與一子官出身如宗子
中有德行才能宗正卿具以名聞當別獎任致理之本

在乎審官審官之由資乎選士將務選士之道必精養士之方魏晉以還澆風未革國庠鄉校唯尚浮華選部禮闈不精實行學非為己官必徇人法且非精弊將安救宜令百寮詳思所宜各修議狀送中書門下恭校得失擇善而行有虞建官三載考績在漢為吏或長子孫益吏久於官則人情無苟官久於事則理化有成日者制度廢隳考課乖舛淹速靡准升降無名欲令庶僚何所懲勸自今以後刺史縣令未經三考不得改易自餘

非在職績効殊尤亦不得越次遷轉刺史停替須待魚書內外五品以上及常叅官在任年老考已深者即量其才効與改中外迭處以觀其能夫明目達聰務廣聞見或處懷才抱器輸忠納諫之倫處地幽遐無由自達永言於此夢想不忘應諸色人有長策濟時忠規匡主任具陳所見詣所居之州委刺史畧與討論觀其旨趣但有裨理道不涉私情便與附驛遞進朕當親覽自立兩稅經今六年初定之時已有偏併或戶口減耗舊額

猶存輕重由不均流亡轉甚委度支即折衷條理以恤困窮古者雖有水旱人無菜色皆猶儲畜不匱勸道有方前代所置義倉國初亦循其制備災救乏甚便於人宜即准貞元故事天下所墾見田上自王公下及百姓每豐稔之歲秋夏兩時州縣長官以理勸課據頃畝多少隨所種粟豆稻麥遂便貯納以為義倉如年穀不成即量取賑給官司但為其法勸課不得收作用度管各委本道遂宜處置聞奏敦本厚生必資播殖當今所切

莫基於斯自今百姓有墾闢田疇於常歲者所加之地
不得輒歲徵租其刺史令長考課亦以本界墾田多少
為殿最令蝗虫損甚州府開春之後量給子種以便農
功天下應荒閒田有肥沃堪置屯田處委當管審細檢
行以諸色人及百姓情愿者使之營田如部署精當收
獲數多本道刺史特加褒升逃戶田地本土復業即却
給還輦轂之下四方會同共應既多難為準定急賦煩
役人何以堪宜令京兆尹與度支計會長安萬年兩縣

每縣委與貯備錢五千貫文縣庫收納定清幹官專如
應緣卒須別索及雜供擬并工匠等縣令與專知官先
給付價錢季冬之後申度支勘會所市和雇並須先給
價錢兩稅一物以上不得科配百姓御史臺朝廷綱紀
尚書省理化根本百度得失繫乎其人自頃制勅施行
所司多不遵守王臣奉職豈所宜然御史臺左右丞切
糾稽違無壅朕命

唐大詔令集卷六十九

欽定四庫全書

史部

唐大詔令集卷

七十五

詳校官編修_臣范來宗

編修_臣裴謙覆勘

總校官編修_臣倉聖脉

校對官編修_臣沈清藻

謄錄監生_臣陶鳴珂

欽定四庫全書

唐大詔令集卷七十

宋 宋敏求 編

典禮

南郊四

貞元六年南郊赦

貞元九年南郊大赦天下制

元和二年南郊赦

長慶元年南郊改元赦

寶曆元年南郊赦

南郊四

貞元六年南郊赦

禮稱日至而郊詩美豐年之報然則迎日之始時莫大
焉順成之應慶莫重焉朕承天眷懷倂作神主朝夕砥
礪日月永思惟人安化洽是勤惟歲稔時和是冀上靈
降鑒豐社聿臻展禮郊丘申大報之義祇禋宗廟極追

孝之誠四海具瞻百神咸秩古者上有大澤必與天下
樂之慶賜遂行無思不備内外文武及仕官諸軍將士
等三品以上賜爵一級四品以下加一階宰相及東都
留守六軍統軍諸道節度使神策威遠金吾六軍都團
練防禦觀察使京兆河南尹正員尚書御史臺長官
太常卿各與一子官大禮行事官各加一階立仗將士
及守營者共賜十八萬端足故尚父子儀與一子五品
正員官如已五品以上量與改轉贈太尉秀實與一子

官張巡許遠南霽雲顏杲卿顏真卿各與二子正員官天下見禁囚徒其罪至流死者各遞減等徒罪以下一切放免左降官經三考流人配隸効力之類經三周年者並與量移近州縣官吏專殺立威杖或踰制自今以後有責情決罰致死者宜令本道觀察使具事由聞奏并申報刑部御史臺吐蕃比虧信約自絕通和邊鎮之間事資備禦因其犯境累獻俘囚既切懷土之心復加幽繫之苦永言覆育何間華戎應所獲吐蕃生口見在者一

切放歸本國仍並差人送至界首量事資遣使得自全
應諸道自艱難以來戰陣喪沒及荒凶死亡骸骨暴露者
長史各令收瘞奠醑守宰之任弊在數更自令刺史縣
令以四考為限嗚呼朕獲主珪璧十有二年於茲天明
地察罔敢不祇一日萬思罔敢不慎遷已之過庶無咎
心致人之安實有明志夫祀之馨香在德天之視聽在
人惟命不常聖有謨訓慶感既集於茲日儆勵方戒於
將來冀勉增修聿懷多福凡百有位所宜同之

貞元九年南郊赦

陸贄

門下朕以薄德忝屬大統皇天眷祐俾主兆人懼不克承夙夜祇畏緬惟前烈致於升平予心浩然罔知攸濟大小之務曷嘗不勤芻蕘之人亦莫不敬慮每存於致理志恒在於恤人中宵屢興終食累嘆一事乖常慙焉疚懷一夫罹殃惻若傷體思與海內同臻太和息其戰爭保其生業降心從衆實靡有辭克已利人誠無所恡然以視聽有極思慮難同况乎長自深宮安於近習損

益之理寧免過差幽遠之情固多未達由是兢兢砥礪
悔往終來燭理所患於不明推心庶幾於無負日慎一
日於今十有五年矣上靈降鑒多士叶誠五稼屢豐四
鄙不擾方鎮輯睦干戈底寧邊壘繕完殊方款附協天
地會昌之運實宗社無疆之休慶既荷於元功禮有昭
於大報矧惟霜露之感永切孝思裡燎之儀每勤精意
將中誠敬其在躬親是與公卿大夫虔奉犧牲恭奠珪璧
陳其文物薦其馨香類於泰壇享於清廟率職來助萬

邦攸同備物致嚴百禮具舉誠慕獲展神人允諧明發
永懷慶感斯集純嘏所錫豈唯朕躬思俾普天均承惠
澤可大赦天下自貞元九年十一月十日昧爽以前云其

見於官司辨對者亦並免官人犯賊不可令其却上以

後勿以為累左降官及流入並量移

云

竄謫遐裔冀

速霑恩比者准制量移所司皆待申牒屢加盤覆累涉
歲年暨淹遲且不均一宜令吏部刑部審檢勘本流貶
及量移勅旨比類元犯事狀輕重月內處分内外文武

從我巡狩涉於艱難錄其忠勞宜有優異應從奉天扈
從至興元文武官將士等普恩之外三品以上賜爵云
云兵興以來垂四十載稅既煩重人多困窮因之以流
離加之以凍餒為人父母實深哀傷誠由德化未敷耗
斂猶廣每欲蠲復與之小休迫於軍儲有意未就姑爾
勤恤減其田租惠貸非多曩憫愧天下百姓貞元十年
地租斛斗應合度支收管者宜並三分放一分如當管
無屬度支斛斗即減放合送上都十分之一其所放斛

斗錢物並委巡院官與觀察經畧等使計會審勘定數分
明榜示百姓仍具申奏去年以來所有貸糧種子並存百
穀內者一切放免富俗安人在於薄斂必不得已簡則
易從自頃削去煩苛定為兩稅既無他擾頗便於時朕
推誠御人所貴存信保此誠法期於不踰凡百有司所
宜遵守倘求取無節則因緣起奸獲利失人殊乖朕意
諸司使及諸州府除兩稅外別有科配悉宜禁絕近年
以來因和市和糴久負百姓錢物並即填還以後官司

應有市糴者各須先付價直不得賒取抑配因茲斂怨
擾人水旱為災古今不免苟有豐蓄則凶年少間屬此多
虞里閭凋耗姑務求於日給不遑慮於歲儲一穀不成
人則艱食害至始救其傷已多俾無餒殍之憂將在脩
之而已宜委諸州府長官每年以當管迴殘餘羨物穀
賤時收糴各隨附近貯納年終具有無多少報中書門下
兼中考功以為考課升降如有替代各分明交領准前
申報若遇災害不稔則量事給與百姓輒有將充諸色用

者以枉准贓罪之其勸課百姓自置義倉仍准貞元元年十一月十一日制處分立人之道惟孝與忠孝莫大於榮親忠必先於竭節唯爾師長卿校洎乎方岳列藩保乂皇家交修庶績竭節之効既昭乃誠榮親之恩宜洽國典應内外文武清望職事官并節度觀察都防禦團練等使父在未有官量授五品官母在未有邑號者各授邑號

云

云

佐運之臣納忠之輔功既存於社稷慶

宜及於子孫故周錫土田漢傳帶礪疇其爵號與國始

終固以明報德之恩勸為臣之義其或年代未遠利澤猶存祠宇已變於荒墟胤嗣不編於仕籍思其人猶愛其樹况奠享之主而不加省錄者乎興滅國繼絕代所以禮先賢也修宗廟敬祀事所以教追孝也化俗歸厚此其大端應凡廟配享功臣及武德以來將相名節特高有封爵廢絕祀廟無主者宜許子孫一人紹封以時享祀自今以後應有廟家子孫但傳襲爵者並許享祔於廟其有毀賣私廟及買之者各以犯教義論自古聖帝

明王忠臣烈士各令長吏以禮致祭書叙明四目達四
聰垂拱而理詩稱濟濟多士文王以寧捨已從人故能
通天下之志棄瑕錄用故能成天下之才昔在太宗勤
求理道納諫如響任賢勿疑致俗於太平垂範於永代
朕獲承鴻緒追纂往猷書之座隅恒自敬勵朝夕翹想
庶聞嘉言夢寐勞懷思得良士凡厥在位所宜共成諸
司百官有陳便宜者各盡所見條疏封進事有冤滯政
有關遺悉當極言無或隱避詔勅不便於時所司執奏

以聞天下有蘊德懷才隱居不仕委所在觀察使表薦
當以禮邀致諸色人中有賢良方正能直言極諫或博
通墳典達於教化或詳練故事長於著述或精集律令
曉暢法理或該明吏術可委理人或洞識韜畧堪任將
相委所在州縣長吏及臺省常叅官詳錄行能舉奏仍
牒報吏部其所舉人並限來年七月內到京朕當親試
緣大禮職掌行事

云云

元和二年南郊赦

朕聞王者大業孝莫盛於配天國之大事禮莫重於享
帝故二儀合祭知天子育物之仁萬國駿奔觀聖人嚴
父之道教之所設禮極於斯我國家祖武宗文經天撫
運聲名所被車馬必同承祧而御極業光十聖體元而
紀號年將二百朕以微眇繼奉昌圖畏此鴻業若臨深
谷而大事所屬仙寢繼營凶德相挺兩隅皆阻淮湖與
壤水旱愆期惻然疚懷懼不克濟既而上天降祐烈祖
垂休妖氛盡弭逆節咸伏精神有以相蕩善惡有以相

資五岳感誠而効靈四氣應序而咸理物皆滋茂歲亦
豐登百姓之心驩然相與是用齋精三日凝謁上玄明
發不寐祇見烈祖周旋在位陟降是虔克配之禮既展
如在之誠增慕嘉此福祐與物惟新式敷顓若之化俾
洽沛然之澤可大赦天下罪無輕重常赦所不免者咸
赦除之左降官與量移及資復仍聽累叙流移配隸並
放還天下應有逋欠在百姓腹內者及京畿今年夏青
苗錢稅並免放官酤酒及雜權率並同禁斷淮南江南

去年以來水旱疫癘其稅租節級蠲放天下兩稅貞元四年制書已及三年一定委有司舉舊勅商量處置諸道年終勾宜停刺史錄事叅軍並不得擅離其事類已後之制勅速令有司刪定江淮大縣每歲據闕委御史三省臺諸司長官節度觀察使各舉堪任縣令不限選數並許赴集臺省官及刺史亦令有闕先於縣令中揀擇如有能否與元舉同賞罰置其員簿以序內外庶官禁郵驛假托乘勢京兆府諸司色役人各令條疏簡省

天下官吏應行鞭撻責情致死者切念察訪王府六品以下官及諸州縣有司并省處分諸官諸使要停減者委有司商量廢省天下百姓不得冒為僧尼道士以避徭役其創造寺觀廣興土木者舉前勅處分之内外文武見任及致仕官諸軍將士等以品秩級級賜勲爵文宣王及二王三恪公主諸王與一子官及賜物有差宗子中有才可用者委中書門下量才叙用故尚父子儀太師晟太尉秀實顏真卿張巡許遠南霽雲及配饗功

臣與一子官及出身有差至德以來功臣未配享者速
令詳定文武常叅官及諸節度使觀察使并諸軍使並
與父母封及追賜并一子官出身有差諸軍立仗及在
本營節度賜物應緣大禮職事官並賜階爵天下諸色
人中有賢良方正能直言極諫博通墳典達於教化軍
謀宏遠堪任將帥詳明正術可以理人委内外官各舉
所知朕親策試天下百姓高年者賜米帛羊酒及板授
官封名山大川及古聖帝明王忠臣烈士各令以禮致

祭

長慶元年正月南郊改元赦

朕聞自昔聖王之所以合天地諧神人莫過乎誠敬致其誠展其敬莫重於祭祭之大者莫大於郊廟故必躬行而心奉之然後百靈助慶萬國蒙福此帝王之孝也我國家祖功宗德立號配天日月所照雨露咸被孝思善繼聖教允升郊丘歲奉於嚴禋宗廟時修其明薦朕以冲昧自獲纘承仰荷眷命懼不克享幸天多祐俾歲大

穰河朔底寧邊封靖謚及此元日至於上辛式遵典禮
有事郊廟當祇見之夕感慕增懷洎大報之辰誠敬彌
勵因體元而配號用敷化以覃恩可大赦天下改元和
十六年為長慶元年自正月三日昧爽以前大辟罪以
下罪無輕重咸赦除之唯故殺人在十惡內者及官典
犯贓不在免限左降官量移近處如復資便任選亡官
失爵不齒者量加優叙左降官及流人先有官者如已
亡歿各還本官天下百姓今年夏稅每貫放一百五十

文州縣應徵科兩稅權酒錢內舊額須納見錢者並任
百姓隨所有足段及斛斗依當處時估送納不得邀索
見錢度支鹽鐵戶部應納稅茶蕪糴鹽價中須納見錢
者亦與時估足段及斛斗如情愿納見錢亦任穩便永
為常式其公私便換錢物先已禁斷宜素兆府切加覺
察應度支鹽鐵戶部三司官吏所由欠負元和十三年
以前諸色錢物斛斗委本司覈勘責如是入已隱欺即
准條處分如緣欠折攤徵元保外無可納者宜並與疏

理諸軍使亦准此處分兩稅不得別有差科刺史如越
違觀察使舉奏觀察使事乖格敕刺史不得輒受中使
及郎官御史奉使所在並不得與人事物諸道諸州縣
宜委中書門下及觀察使刺史量閑劇形便可並省者
具事宜聞奏河北諸道管內宜委本道團定兩稅務令
均濟河北州縣凋殘戶口未復其官各據郡邑大小量
公事留置餘並權停應諸道管內百姓或因水旱兵荒
流離死絕見在桑產如無近親承佃委本道觀察使於

官健中取無莊園有人丁者據多少給付便與公驗任充永業不得令有掌職人妄為請射其官健仍借種糧放三年租稅權酒錢已有分配百姓處又置酒店官酤并諸色權率切宜禁斷亡官失爵放還流人有庄田不經沒官被人請射本主子孫到並委却還天下諸色人中有能精通一經堪為師法者委國子祭酒訪擇具以名聞其大理寺官宜令精擇有志行詞學詳明法律者注擬其有課績特殊堪在朝獎者臺省官有關宜先選擇

自今郡守恪奉詔條清廉可紀四考與轉諸道或閑糴
禁錢自為條約切宜禁斷其内外文武及致仕官三品
以上賜爵一級四品以下各加一階陪位白身人賜勲
兩轉故尚父汾陽王贈太師晟贈太尉秀實各與一子
八品官顏真卿杲卿張巡許遠南霽雲各與一子出身
武德以來功臣子孫量加獎用中書門下及節度使帶
平章事各與一子八品正員官祖父母父母並與贈官
官封父沒母存者與邑號已贈已封者更與追贈禮儀

使大禮使度支鹽鐵使京兆各與一子出身文武常叅
官并致仕官及諸道節度觀察經畧等使及神策等使
諸軍使父見存者量與致仕母存與邑號父母亡歿與
贈官及邑號東都留守及諸道節度觀察經畧等使神
策金吾六軍將軍威遠鎮國軍等使各與一子出身陝
州奉天興元功臣更賜勲爵有差身沒未經追贈者並
與追贈應緣大禮移仗宿衛御樓立仗將士普恩之外
贈勲爵有差仍準舊例賜錢物二十萬四千九百六十端足

貫大禮職掌行事官及留守等更賜贈勲爵及加升階
壇殿行事官更特加一階應在城內蕃客等賜物有差
常叅官及刺史有停替及病假解官及終制未授官者
委中書門下量才進擬其情願授致仕官者亦聽天下
諸色人中有賢良方正能直言極諫博通墳典達於教
化軍謀宏遠堪任將帥政術詳明可以理人者委有司
各舉所知限今年十月上都天下百姓高年者賜米
及綿帛有差

寶曆元年正月南郊赦

門下朕以眇薄纂承洪構祇見九廟肇祀二儀外飾備
物中惟盡志昆蟲草木之實致豐於蠲潔愷樂和愉之
感庶交乎神明四海奔走衆祇授職冀下觀而化皆內
誠乎心百王之禮樂在陳列聖之聲詩合秦敬極嚴配
道備饗親虔奉成式惕焉惴懼而今後不敢滿假庶無
大悔以貽祖考之羞因體元以統歷遂洽恩而大宥可
大赦天下改長慶五年為寶曆元年自寶曆元年正月

七日昧爽以前大辟以下罪無輕重已發覺未發覺已結正未結正繫囚見徒常赦所不免者咸赦除之其官典犯贓不在免限左降官自長慶四年三月三日制後未經量移近處已經量移者更與量移如復資者即任依常調選丁憂去任服闋日亦與量移如有親故在上都任於所司陳狀便與處分不必更待本州申請別勅因責降授資正員官未經改轉者亦與進改亡官失爵放歸不齒者量加叙縱元勅云終身不齒者亦量與

收叙流人未到所在及已到者量移近處如已收叙者
量才錄用并僧尼道士移隸者亦與移近處得罪人已
亡歿家口未許歸者一切放歸如自情愿住者亦任諸
已得罪人中有先勅云縱逢恩赦不在放限者并別勅
安置者亦並宜委中書門下量事狀輕重節級處分左
降官及流人先有官者如已亡歿各還本官流貶人所
在身亡任其親收以歸葬仍仰州縣量給棺槨優賞發
遣諸色人中有痕累禁錮及畔逆緣坐等一切並興洗

滌常叅官及諸州刺史有先因停替及因病假解官并終制未授官委中書門下量才進擬勿令稽滯致仕官未經改轉者量改官依前致仕諸軍先擒獲吐蕃生口配在諸處者宜委本道資給放還本國勿許因循所在停住國家與吐蕃舅甥之好彼此無虞自今以後邊上不得受納投降人并擒捉生口等天下諸州府縣官吏應行鞭捶本罪不致死者假以責情致令損斃每念於此良增惻然宜委御史臺及出使即官御史等切加察

訪仍具事由聞奏澄清教化莫尚乎太學明治心術必
本乎六經天下諸色人中有能精通一經堪為師法者
委國子祭酒訪擇具以名聞奏天下州縣各委刺史縣
令招延儒學明加訓誘名登科第即免征役刑罰不清
不足以言理命官不重不足以招賢閑出入之文束上
下之手必資慎選庶叶詳平大理寺官屬比來吏部所
授多非其才宜令精選有志行詞學兼詳明法律者注
擬其有課績特殊堪在朝獎者臺省有闕宜先選擇一

夫不獲時予之辜苟有向隅之悲遂軫納隍之慮如聞
去冬吏部三銓選人駁放者衆或文狀舛錯或書判差
池主司守文不得不爾既施惠澤亦在霑恩其長名及
雜駁選人有未離京城者委吏部今月檢勘畢除涉踰
濫者盥却收以比遠殘闕量才注擬如不情愿受遠官亦
不可強之仍速處分不得出選限內比者下令立科彰示
大信法既無守人何適從赦命不行因循成俗誣告四
方為虛設開施庶政為空文豈吾德之未明為有司之

見負永言歎息中夜疚懷朕即位之初已有敕令至如
捐徹服御止絕他獻限喪葬以息淫費禁竒靡以專女
工隱實版圖謹守儲備及他徭擅賦閑糴禁錢吏行姦欺
人冒依庇僧道踰濫流貶重輕錢弊利害軍士侵占車
馬衣服之制度公坐入已之贓私悉令條疏貴欲該備
頒宣未幾廢格已多或職司惰慢而不能將命或詔命
纔行而下已不守以此求理不亦難乎其元和以來詔書
并長慶四年三月三日敕令委廢不行事在朕躬諫臣

極言得失無有所隱其在臺閣者左右丞據詔令司額重加分配勿容推倚若因循寢廢無所申明及雖曾宣下不能提舉者具事由聞奏量加沙汰其在百司州郡者委御史臺及分察使出使官卽官御史度支鹽鐵巡院准前後詔勅切加訪察各具犯狀移勘聞奏其本判官及刺史以下必加貶責用懲不恪如察舉之司循默自守事狀他露者亦據他疵量加殿黜仍並委中書門下重有舉明去年三月三日赦令及今年赦文一事以

上切加懲責據時限量官吏勤惰具科殿重輕聞奏京
西京北邊上諸軍州鎮自今年以後如有中使及郎官
御史奉使到所管並不得人事與物應天下典人庄田
園店便合祇承戶稅本主贖日不得更引令式云依私
契徵理組織貧人虞氏建官必明黜陟漢朝置吏皆長
子孫政成簡用或登右職近代遷除過速資給轉繁扇
為時風莫有固志親人之職為弊尤深毗俗土宜未及
周悉迎新送故已聞代換更閱雖遽資望如初善否不

分升降莫辨徒為煩擾無益公私自今以後刺史縣令
若無所犯非滿三周不得除替如理行尤異但議就加
其有才宜他職灼然要籍者中書門下先具事由及授
上年月奏聽進止滿歲遷代無闕敗者即與進改磐石
維城義深麟趾穠華下嫁禮次椒塗縉紳文武之良材
執事恪居之奉職克叅裸獻載叶肅雍亞獻嘉王運終
獻循王適等各賜物一百疋夾侍正衣進珪各賜五十
疋亞獻終獻正衣各賜四十疋大長公主嗣王郡主縣

主各賜物内外文武官三品以上賜爵一級四品以下
加一階合入三品五品欠考未合叙者待考足日聽叙
斯文未墜降聖克昌道逾三代之英化立百王之範象
賢崇德垂裔作賓教義斯崇憲章無改文宣王二王三
恪與一子官其祠廟委所司量加修飾克稱惇叙因述
本枝收族是先觀型斯在皇五等以上親三品以上賜
爵一級五品以下陞一階六品以下及前資常選散官
簡選日優與處分未有出身陪位者每家放一人出身

應陪位皇五等以上親及太皇太后三等以上親三品
以上賜爵一級四品以下加一階諸親四等五等及諸
州賀正官并諸色陪位官等五品以上加一階六品以
下及白身人並賜勳轉其爵及有出身者各減一選締
構興王弼成昌運勲藏冊府烈冠史編九原推可作之
風百代凜如生之氣載懷丕績何日敢忘武德以來配
饗功臣及將相名節尤著長慶四年三月三日制未霑
甄叙者委中書門下條疏奏聞量與優獎故尚父汾陽

王贈太師子儀贈太尉秀實子孫未曾經甄獎者每家與一人正員
官元和以來有因戰伐死於王事其名節顯著未有優贈
者各委本道節度使條錄聞奏如勘覆詣實當有處分
其有骸骨暴露者宜令所在埋瘞宏教愛之理爰命推
恩念追遠之懷用頒徽贈常叅官及諸州府長官父母
見在未有官封並量與五品致仕官及階并邑號父母亡
歿未曾追贈者量與封官及邑號已經追贈者更與改
贈如贈官已至一品邑號已至國夫人者不在此限中

書門下及節度使帶平章事者宜與一子正員七品官
祖父母父母先歿各與追贈經追贈者更與改贈官已
至一品邑號已至國夫人者不在此限節度使與子正
員八品官東都留守度支鹽鐵使觀察處置都團練防
禦經畧招討等使及神策金吾六軍將軍大將上將軍
統軍威遠鎮國軍等使皇城留守各與一子正員九品
官京兆尹特加一階父母先亡歿未經追贈者各與追
贈職修祀事禮奉嚴禋既合殊恩宜加異等應郊廟升

殿行事官普恩外宜更加一階如合入三品五品者任
待考足聽代尚書省三品四品以上中書門下五品以
上特加一階便蕃殿省給事郊丘顧以忠勤是宜甄獎
內行事者三品以上更賜爵一級四品以下更加一階
內侍省及內坊官四品以上各賜勲五轉五品以下各
賜勲三轉應從駕至郊廟者普恩外三品以上賜爵一
級四品以下各加一階品官白身賜勲兩轉環列師營
服勞扞衛中威攸屬敷惠是應神策六軍金吾威遠皇

城及諸道將士等三品以上賜爵一級四品以下加一
階無階者賜勲三轉在城神策六軍威遠營左右金吾
及皇城將士應大禮移仗宿衛御樓立仗等普恩之外
三品以上賜爵一級四品以下加一階仍準舊賜物有
差神策將士加一階仍準舊例賜物有差其神策將士
應在京畿諸縣者亦各有賜物應緣大禮職掌行事官
并修撰儀注及留守副留守守倉庫卿等普恩之外三
品以上賜爵一級四品以下各加一階虔奉職貢載觀

郊裡內裨覃賚之恩外廣懷柔之義鴻臚禮賓院應在
城內蕃客等各有賜物翰林待詔供奉并諸色直見任
及前資并員外試官三品以上賜爵一級四品以下各
加一階無官者勲兩轉導蕃服之誠承帝庭之命忠勤
既著勲賞宜周遽知上都進奏院官在城者各賜勲兩
轉應緣大禮四方進表疏及賀正官各賜勲三轉敬承
裡祀贊執豆籩列庶衛以觀光肆多儀而中矩誠在嚴
恪理叶褒嘉郊廟行事齋卽減二年勞室長掌座禮生

贊者減一年勞無勞可減者便放出身崇玄館行事學生及齋郎禮生番考已滿所司緣大禮却追入行事各減一選國子監生陪位者賜勲一轉中書門下儀注官各特賜一階應緣祇供作官直司長上諸州行綱考典兩縣者壽諸色番役當上在城并量留十二月番者各賜勲兩轉飛龍閑廐宮苑典引掌扇內園少監裁接少府將作中尚武德軍器內外弓箭庫等諸司諸使下白身人及無品直司定額長上雜匠巧兒黃衣長上監直

長雜使三衛七邑引駕細引執扇角手弩手驍騎武士
天文觀生厯生漏生典鼓典鐘工人樂人主膳主酪典
食胡食手宰手掌閑幕士御士醫士獸醫門僕藥童御
書手楷書手典書流外行署等各賜勲兩轉尚年貴老
所以教孝也聳義嘉節所以貞俗也天下百姓高年者
上縣以上每縣十人中縣五人下縣三人並以縣界年
最高者充數并孝子順孫義夫節婦先經旌表行義不
虧者令人各賜米三石絹兩疋仍板授上佐縣君並委

令長齋米帛就家賜訖具名本道一時間奏其米及絹於
上供數內申報神配峻極德稱靈長秩既升於王公禮
合加於牲幣五岳四瀆宜委本州府長吏備禮致祭當
極豐潔以副如在之誠書稱望秩禮著登封仰堯舜之
聰明慕文武於方冊遐想忠貞之跡緬懷忠烈之風能
禦大災咸中祀典名山大川及自古聖帝明王忠臣烈
士各令所在致祭亡命山澤挾藏軍器百日不首復罪
如初赦書有所不該者所司具作條例聞奏敢以赦前

事相言告者以其罪罪之赦書日行五百里布告天下
咸使聞知

唐大詔令集卷七十

欽定四庫全書

唐大詔令集卷七十一

宋 宋敏求 編

典禮

南郊五

太和三年南郊赦

會昌元年南郊赦

會昌五年南郊赦

南郊

太和三年南郊赦

王者祇見宗廟情極於孝思肅事郊丘義崇於嚴配諸
侯駿奔於助祭百靈胥饗而降祥感達神祇斯為茂範
朕以冲昧獲嗣丕業兢懷寅畏於今四年屬興伐叛之
師未暇燔柴之禮今因南至有事圜丘荐誠敬於二儀
申感慕於九廟羣祀來享至誠必通既陳信以告虔宜
覃恩而廣澤可大赦天下自太和三年十一月十八日昧

與以前大辟罪以下罪無輕重常赦所不免者咸赦除之惟犯惡逆以上及故殺人官典正犯入已贓不在放限左降官量移近處已經量移者更與量移縱元勅云終身不齒者亦量與收叙諸色得罪人中如先有勅云縱逢恩赦不在免限并別勅安置者亦並委中書門下量事狀重輕節級處分常叅官及諸州刺史有先因停替及以病解免并終制未授官者委中書門下量才進擬其有偽出身人近已從流者與移近處未處分者減等處分未發

覺賣官買官人並仰敕書到後一月內於所在納官告贖得免其罪如不陳首者已後事覺不在免罪限其京兆府來年夏青苗錢宜放一半應度支鹽鐵戶部三司所管諸司官吏所由人戶等節級疎理放免天下除兩稅外輒不得科配其擅加雜權率一切宜停仍令御史臺及出使郎官御史并所在巡院嚴加訪察應緣乘輿服御宗廟供須一事以上當從儉約自今以後四方並不得輒以新樣難得非常之物為獻其機杼織麗尤甚若花綵布縑綾

之類及幅尺廣狹不中度者並宜禁斷仍仰天下州府
勅到後一月日內所有此色機杼一切焚棄犯者以故
違勅論諸道先割屬支郡將士如聞衣糧猶繫使司詳
其事理頗非簡便宜委本使差官檢元割名額及糧賜
等第交案與刺史勘會除續准詔勅抽停外據所合給
錢米並以當州合送錢米依實虛拆計割入留州錢米
數勘會訖州使各具分數聞奏應緣解補支給並委本
州其使司更不得收管方鎮判史在京除官所須收補

隨從人數有即為節限他時替罷仍令隨使停解其方鎮交代之時及知留後官不得輒有補署刺史職在分憂得以專達事有違法觀察使然後舉奏頃年赦令非不丁寧如聞遠地多未遵守州司常務巨細取裁至使官吏移業將士解補占留支用刑獄結斷動須稟奉不得自專雖有政能無所施設選置長吏將何責成宜委御史臺及出使即官御史嚴加察訪觀察使奏聽進止本判官不得匡正及刺史不守朝章並量加貶降若所管州

郡控接蕃夷軍戎之間事資節制須得使司共為條理即
不在此限如聞近年以來京城坊中及畿甸百姓等多
屬州軍諸使諸軍召補之時都無旨勅差科之際頓異
編氓或一丁有名則一戶全免宜委本軍本使及京兆
府切加提舉准元和二年八月京兆府所奏勅及長慶
元年之節文處分諸色出身三衛最濫假冒官廕妄用
優勞其三衛宜三二年且不得補人數盡無如更要補委
有司條疏嚴為限制每所補注挾名替闕如便可停廢

亦詣實聞奏其六宅十宅諸王女縣主宜令每年於選人中擇情願者配尚授官之時量加優賞罷秩之後仍減兩選其初婚者更有賜與使備行李如非士類不在選限武德以來配享功臣及將相名跡尤著節義顯聞而子孫陵替官闕廢墜未經甄錄者委中書門下搜訪胤嗣特加優獎故尚父汾陽王贈太師晟贈太尉秀實子孫中未經甄獎者每家與一人正員官亞獻循王適終獻恭王通等夾侍正衣進珪捧珪各賜物有差內外

文武及致仕宗室官諸親太后三等以上親并應緣郊廟大禮行事進階給賞賜各有差

會昌元年三月南郊赦

門下古之令王肇建皇極莫不嚴裡郊廟統和神人將以承上天之眷命告下土之率服恪有令典留為後法是太陽施光調無私之臨照和風扇物樂有截之吹嘯明察為先誠敬攸屬斯道不遠弘之在予朕以寡昧入奉丕構應三靈之協慶祇一德以咸有夏韜初懸惟賴

元臣忠力虞琴方鼓永冀萬國驩心顧以涉道多闕惕
若馭朽漂如蹈冰納隍勤誠勵之懷置器審安危之地
苟一物失所時予之深辜粵以獻歲告辰禋祀上帝煙
燎既達牲幣克修百神受職而恭敬六合承休而霈洽
禮成而退慶孰大焉思與公卿大夫內外臣庶道迎喜
氣同我休嘉變生人之耳目振大化之綱紀立號垂統
自中彤外延八表之福敬昭萬象之惟新事天之禮既
因高以荐誠及物之思宜順時以布澤可大赦天下改

開成五年為會昌元年

會昌五年正月三日南郊赦

門下王者事帝必嚴禋祀之容臣下歸功爰極推崇之
義既膺顯號式展隆儀因時布和順歲更始前聖垂範
逮予是遵矧以眇身幸逢昌運雖履氷惟懼而涉道未
周繫我輔臣洎茲列岳內盡交修之志外分共理之猷
乃者虜衆乖離部落分散收帝子於璫裘之所致名王
為冠帶之臣昆夷來朝不遠萬里蠻貊向化克同九州

重以上黨狂童竊襲叛逆問罪之師既集元亮之首遂
梟廓清亂風洗滌汙俗剪逆弁而故都底定竄摩尼而
壞法永除由是退惡進賢化行令舉刑奸賊之吏黜黷
貨之家此宗社降靈助成時政豈朕涼德獨擅厥功而
中外諸臣文武多士累陳懇疏再舉鴻名辭不獲從被
此虛美是用虔告清廟明禋上玄煙燎所升虛貺如答
既享郊廟重申國經宜因行慶之辰誕布惟新之令同
我景福永孚於休可大赦天下

唐大詔令集卷七十一

欽定四庫全書

唐大詔令集卷七十二

宋 宋敏求 編

典禮

南郊

大中元年南郊赦

乾符二年南郊赦

南郊

大中元年南郊赦正月十七日

門下執大象者導陰陽之和帝率土者茂生植之化粵
自軒昊暨於唐虞側身皇階虛已大寶握金鏡之明耀
致玉燭之融明惠中國以綏四方欽上玄而育兆庶所
謂至德勞深企懷朕荷先帝之眷求奉祖宗之成憲獲
撫萬國統和三靈兢嚴丕措惕勵神器實賴昊穹嘉享
神祇降休蠻夷戎狄之聿來鳥獸草木之咸若真宰潛
運立功啟光麥禾豐登兵革偃息物不疵癘人無天昏

發揚氤氲數佑寡昧夙夜祇戴訏謨紀經尚懼德教之
未宣黎元之未泰暴虐之害政朋邪之敗風常軫念困
窮思臻富庶每興赤子之嘆不知黃屋之尊爰因首政
克舉彝典告受命之纂緒展嚴配之盛儀柴燎升聞馨
香殷薦羣禮昭答百神來享精誠既達感慶良深是用
肆青恤刑改元建號利時者不廢使人者必行俾覃在
宥之恩以順發生之氣與之更始咸使惟新可大赦天
下改會昌七年為大中元年

乾符二年正月七日南郊赦

元化序時日月啟貞明之照神功宰物乾坤垂履幬之
仁萬物仰而遂生百王體以為用朕虔膺睿命恭守丕
圖懼忝所承慮違厥道每馭朽以思戒若涉川而靡寧
自臨御以來夙宵增勵幸而文修政簡歲稔人安賞罰
惟公忠厚成俗道漸臻於清淨理將致於雍熙由是禮
上帝用答天休御端門以崇皇極是彰報本式叶元休
尚念蠹於政事者未除害於時俗者未革盡施條制以

絕根源更表申恩仍行肆青昔殷湯解網實謂至仁漢
文措刑永稱聖理在宥乃為君之德好生實有國之規
今復承以陽春之時布其渙汗之典上符天意旁契人
心大禮備陳彝章克舉謀猷廣備聲教遐宣期昭泰於
寰區亦涵濡於動植溥天率土既樂玄風四海九州宜
覃慶澤可大赦天下自乾符二年正月七日昧爽以前
大辟罪以下罪無輕重已發覺未發覺已結正未結正
繫囚見徒常赦所不原者咸赦除之惟犯十惡叛逆以

上及故殺人官典犯入已贓兼情涉巨蠹及持杖行劫并故殺人者雖已傷未死更生意欲殺傷偶時死者並同已殺人法處分買賣毒藥開劫墳墓及刑獄之內官吏用情推勘不平因成冤濫無問有贓並不在原免之限敦本睦親古今典制永惟負荷常切憂兢應宗室有材行可昇淪落在外並委宗正卿專加察訪旋申尚書門下量材處分惠安皇太后凡有總麻以上親各委所在搜訪聞奏仰酬顧復何擇親疎爰念播遷重命牽復

至於殂謝亦使惠綏用表深仁以彰玄化左降官量移
近處已經移者更與量移如官至刺史准刺史月限例
處分諸色官未復資者有司別條疏聞奏如合復資者
五品以上中書門下便與處分六品以下任依常例選
集丁憂去任及在憂制受貶者服闋日亦與量移緣責
除降資正員官及緣累停免未經引用者並量與進改
流人及降死從流者移近地如已收叙者量材錄用并
僧尼道士移隸者亦放還勸善懲違朝廷大典苟或隳

奈何以聳人其流貶人其中或有情狀巨蠹物議不容者不在該恩者流貶人如已亡歿家口欲還及須歸葬者聽隨所便如緣葬事幼弱飢寒不能自濟者委所在長吏量給棺櫬優恤發遣左降官及流人等有官者如已歿各還本官亡官失爵痕累禁錮者並從洗滌諸色流貶人元勅內云雖逢恩赦不在量移之限有自前年十月十二日赦書後已量移者五千里更與量移一千里三千里外與量移五百里情狀難容者不在此限天

德五城流人負罪素重元勅未經十載不得放還今屬
洪恩須令沾及宜減三年如年限以來滿便放還從九
月四日降郊禮勅後流貶及引決妄稱冤人等并重推
覆囚徒並不在此限近日奸險之徒多造無名文狀或
張懸文榜或譟造童謠此為弊源合處極法應捉獲此
色者准持杖劫人合造毒藥例經赦不原其所得文狀
准律文於所在焚毀不得徵逋賊以利疲人是叶政經
期為理本京兆府去年夏青苗錢每貫量放三百文所

放錢如有司占留色目委戶部准舊例據數支填其
咸通十一年以前百姓積欠兩稅斛斗及青苗榷酒錢
并私草職田糠麥趙棘棘等徵收不得空繁簿書者前
年十一月十二日敕令已令蠲放至今尚未了絕宜令
所司速具放免錢物數目分析奏聞如在官典所由腹
內者不在此限從咸通十三年夏以前京兆府所欠諸
陵園及諸軍諸使錢草斛斗并諸雜物一物以上宜並
放免其諸縣所欠府司錢草斛斗一物以上亦並放免

從咸通十三年夏以前京兆府所欠諸陵掌閒驢騎丁
資三衛昔資錢亦並放免甸內逃亡人戶尚徵稅物切
要條疏以安疲瘵委京兆府差官逐縣勘覆其逃亡人
戶產業田地未有人承佃者其隨田地苗稅除柘榷酒
錢及斛斗等並權放三年勒常切招召人戶三年後再
差官勘覆據歸復續却收稅從咸通十三年以前甸內
所欠延資庫戶部度支榷酒除柘天和糴賑貸錢物斛
斗一物以上並宜放免內庄宅使巡官及人戶等應欠

大中十四年以前至咸通八年以前諸色錢六萬二千三百八十貫三百文斛一十萬三千七十四石九十絲二十二萬七千五百八兩麻二千四百七十斤草二十六萬五千八百五十五束念其累歲不稔人戶貧窮徒有鞭笞終難徵納並宜放免三司所錢物已遣不徵必慮依近遣尚猶追擾度支戶部鹽鐵三司應收管在城及諸州府諸場監院所欠咸通十年以前諸色錢物斛斗等前年十月十二日赦文並令放免所司不得更生

節目妄有進徵如聞所司官吏緣循至今尚有盤勘都非公但務生情歲月轉深奸弊頗甚各委本司差定官一人專勾當但據見在文帳檢勘除官典所由請領官錢和糴和市及在場官供官招商所由帳內正身見在外其身已亡歿曾經檢責及其身見在貧窮家業蕩盡無可徵納者并逃竄捕役未獲因繫妻男攤徵保人等仰便據年額請免除去簿書不得更行文牒妄有盤問赦書下後限一箇月內具放免錢物單數分析聞奏如

更稽遲本勾當即官當議貶黜典吏等痛加懲斷停解
天下州縣官銓司注擬便有選自朝廷多故三司監院
官索州縣承迎云是制院恐嚇州縣影占富豪從今後
有監院處亦仰州縣常加聽察如監院官有不公不進
各申本州行牒本司使如狀事稍重仰專差使送中狀
本司事大則任聞奏兼申中書門下御史臺以憑推勘
所冀遞相檢察不敢侵凌諸司更換素有定規近日苟
且緣循漸至虛折商徒則獲利倍於往日所司則侵損

轉難任持若不條疏積成蠹弊其三司更換宜令准咸
通十五年閏四月二十一日度支所奏處分如尚踵前
必舉朝典制置新歲酒錢其戶貧破者州縣不令破戶
或賣柴傭力以納稅令所由司條疏聞奏其河南府界
蒿荒地委河南尹於稅錢三分之量與免二分勿令使
無路營生聚為草賊其天下州縣除已准元勅徵收兩
稅權酒錢茶鹽利旨支米價等分外餘額外如徵別配
及販柴炭之人納稅等元無勅文緣本道奏請降勅並

仰勅內使皆停罷仍限勅到後二十日內外分析聞奏並不罪今日已前之事如又不已必舉明刑曾經水旱已放徵科或慮緣循須更提舉諸道州府或有遭水旱甚處去年夏稅合納苗稅等錢委本州府長吏酌量蠲放其咸通十年以前所欠負兩稅錢米等在百姓腹內徵收不上者前年十一月十二日敕書已放免仍委州府速檢勘蠲放分析奏聞所在州縣除前資寄住實是衣冠之外便各將攝官文牒及軍職賂遺全免科差多是豪

富之家致苦貧下准會昌中勅家有進士及第方免差役其餘只庇一身就中江南富人多一武官使庇一戶致使貧者轉更流亡從今後並依百姓一例差遣仍委方鎮各下諸州准此檢點江淮運米本實關中只緣徐州用軍發遣全無次第運腳價妄被占射本色米空存簿書遂使倉廩漸虛支備有關緣循弛慢全自職司宜令轉運使速具條疏分析聞奏纔及春緩便須差清強官吏節級催驅嚴立科條須及舊額苟或踵前容易必

舉朝章郵傳供頓遞馬數目素有定制合守前規河南
館驛錢物至多本來別庫收貯近日被府司奏請衆同
支用遂使遞馬欠缺料糧不充憲司又但務緣循都不
提舉宜令東臺館驛使述具條疏分析聞奏東都留守
所管兵數不少無非市肆之人緩急抽差全不堪用防
衛官闕尤非所宜頃有條疏以革前弊宜令速分析見
在闕額并老弱人數聞奏應緣州府經費悉有舊規近者
不務在公惟思潤己或聯遇豐稔亦不貢羨餘若小有

水旱即競有論請致令朝廷事力轉困全在臣下誠敬
無乖自今以後如輒將上供一錢物支用並當加譴責
不在原貸之限如本道實有災荒積歲為衆所知者不
在限例朝廷徵發兵士固非獲已道途頓遞費勞至多
又聞節級須得人事裨補每縣不下五千文盡配疲人
深可哀憫自今後但供備無缺輒不得踵前率配如或
違犯縣令本曹官重加貶降吏人決杖配流其都知兵
馬使以下並以枉法贓論立法之始當在必行諸處本

置作坊只合制造戈兵甲及進獻供須昨徐方用軍諸道多無兵器內庫般送填塞道途如聞作坊惟使雜伎弓甲之匠十無一人打築即惟務精新器甲則多妄修整自節察至刺史皆為信臣不能委曲條疏各宜自知改革諸道兵士非惟缺額不堪兼又軍將數多一員敵官健數分又占官健當直遣納課錢其弊數重深要除蕩仰諸道各自檢點如或本自書題又無功效非軍中子弟空請職名者並皆疎理其軍將等各遣納課錢者

並准入已贓結罪科斷東畿之內留守影占最多稍富者不陳城外村中盡有一虛明文牒亦犯罪者亦稱此名府縣若追但行牒却取自小則推勘了牒送事重者則與勒停委留切不得遮奪免致閉傷其在京諸司亦仰各依此例如被抑屈但其奏聞且徵兩稅自在有常期苟或先自准驅必致齊人凋弊蓋緣機織未畢特踐未終便須令賣繅繒賤糶斛斗致使豪首迫蹙富戶吞侵須更申明俾其通濟諸州府如有不依旨限先期徵

稅者長吏聽奏進止縣令錄事叅軍並停現任書下考不在務恕之限關要之外聲教至遙每念疲人尤多橫役訪聞五嶺諸郡修補廨舍城池材石人工並配百姓至於糧用皆自賣持既不折稅錢又全無優恤永言凋瘵實可憫傷自此委節度觀察使接借本錢并刺史百計收拾運轉別立修造案名額遣幹濟官主持常令急遂修營勿遣大段摧毀永放百姓額外差科已債卹人斯為盛美遐荒賤吏尤可哀矜先於咸通五年梧州糴

十萬石米停貯數載之後方令盤送邕交如聞平濕損傷雀鼠耗折計其所言六萬石餘累載以來亦頗校料徵納主持軍將十餘輩攤保累數百家或科決不輕或資財蕩盡典男鬻女力竭計窮盡虛掛簿書徒為羈繫宜從寬宥用釋殷憂其所欠米委度支一時放免邕南交趾屯駐兵士全無運糧俾其足食湖南江西管内諸郡出米至多豐熟之時價亦極賤網官若得錢收糴每斗必有盈餘道途既可經營輸納庶無敗闕緣於官倉

領米刮鐵平量既潤資陪便致吞侵耗折所以經年累
月舳艫相交江路多有沉淪軍食常憂久缺自今仰所
在長吏切須饒潤網官并令交付腳錢仍與善價羅買
嚴示刑賞不使稽遲邕州安南晏州見屯諸道行營兵
士合食米錢等三處兵數近四方日食錢米費用極多
全在諸道州使巡院饋運相繼免失支持近日以南中
為警急抽差皆務循將相同常事益緣地遠差網無利
皆託以鹽鐵戶部指揮未得分明申報逗遛圖延界分

或有未有本色皆云額望收錢及網官進發之時欠脚
錢途路侵盜錢米所至稽停每發一網便逾星歲致令
供軍使頻申三處月限不相接續所司前後申奏行牒
督責非不丁寧蓋緣只有科貶之名曾無必行之令遂
致全無凜懼但務緣循若不嚴立科條必恐轉成敗失
其諸道州使巡場監院所合搬送南中供軍錢米各委
所在長吏併發網船以濟軍用仍委逐道節度觀察防
禦經畧刺史差最大判官一人專判校科其巡場監院

官場官自專催促各令設法勾當克濟軍須如依前逗遛不早送申遂使邊軍糧儲久闕供奉不得相續便據所欠錢米處勘遂重加貶責如州使官吏場監院官能罄誠節慎選行網支遣及至舟船繼至即重議酬獎河東向管延資庫斛斗五十萬石每歲出陳入新之際勞擾州縣百姓至多未有用時積為深弊宜令本道節度使點檢除道路與邊鎮接近緩急堪般充軍糧者即且准前其餘深僻州縣並速條疏分析聞奏義倉斛斗本

防災年所貯積歲多翻成侵害又差重丁大戶充倉督
子弟主管凡節察及監軍使刺史縣令到任仍須二毫
量差役鄉夫數重勞擾每一量復欠折轉多主掌之人
貼家竭產生靈塗炭州縣困窮從今後宜五年一度變
換便糶貨收錢入冬却糶仍委本道監使常加訪察如
有上下蒙蔽欺隱破除聞奏但不要初上之日須重覆
量每擾度人朝廷大弊在於令不行只如經水旱州三
降勅命不許將逃亡規攤見在人戶遭災水旱處有於

見在戶內陪徵或至三陪又近年以來節度觀察使或初到任或欲除移是正二月百姓飢餓之時分遣二日條先抽徵見錢每一千文令納三四百此時無不兩陪三陪生生舉債至有賣男女以充納官行彼貪心殘我赤子從今後有如此者必舉極法以謝生靈諸道事例差使結懽法信出於官中答獎歸於私室駐留供備迎送優豐進獻不副常程結好却為公事惟奏欠缺不思本源且鄰境結懽何必事須厚幣來者若為私物去者

何必官錢道慕空門名為釋子若非精進何以住持應城及諸州府僧尼元勅人數外不得轉令私度如有死亡等闕即任據人數堪填補年終聞奏待五年限滿時每收補皆須選擇有戒行事業者勿令濫雜之輩於此容身天下刑獄申到法寺及刑部有經數年不得了絕省寺人吏競邀賂出入律文大理寺及刑部官僚不親公事致死一案之內半死獄中從今後委中書門下每日點檢如停滯者大則貶降小則停勒其刑部郎中員

外切須選擇亦不得輒其奉使以望賄財有文案則併送對廳行貨財則獨收私第准咸通十一年條疏諸州刺史三千里外限三十箇月二千里外限二十七箇月近者勒刺史到郡交代則可以計到郡月滿便且除移如新除者則須待月限滿除替其餘內外諸官並依咸通十一年條疏如有有限未滿錯替者任經中書門下過狀便與追勅有過失須替則不在此限兩省官本令先任四赤令貴欲知人疾苦近者纔三五月則替何殊罔

生空陪優人從今後宜以十五日為限兩畿令府判司
從前吏部注擬頃年或除三人兩人近者乃至除望縣
令及部尉等中書自不存體百司何以仰瞻其進焉十
年本限五年方滿近者旋替年深致使入仕多門三銓
無缺從今後如或用年深缺補人兵部郎官必議貶降
詞科出身士林所重本貴踐歷漸至顯榮近者惟扇澆
風皆務躁進麻衣纔脫結綬王畿是能十年宦途今來
半歲遷授頗為訛弊須舉重明自今以後進士及第並

須滿二周年後諸道藩鎮及戶部度支鹽鐵及在京諸司方得奏請如未及奏官限內有攝職處一任隨牒攝其弘文館集賢院奏請直館校理並依此日限如出身後諸道奏已請初銜未得而考者輒便奏畿內尉充在職兩考方得依資除官改轉其授使下官先自有月限資序一一須守舊規不得超越比擬准咸通十四年十月九日敕文處分關節取受本身值財素來貧無亦多舉債祇緣從來赦文未甚分明賞罰若行必當止絕自

今以後如果有人用錢買官納銀求職敗露之後言告之初取與同罪卜射無捨其錢物等並令沒官送御史臺以贓罰收管如是波斯番人錢亦准此處分其櫃坊人戶明知事情不來陳告所有物業並不納官嚴加懲斷決流邊遠庶絕此類用其清平樂官乞託本自人情既越舊規過於債負雖累有明勅尚不遵行兩巡不切追擒教場又不鈐轄從來上於方鎮近日方鎮與樂官人事轉多別有遷除例皆乞覓喧呼門戶擁塞階庭以此

得官人不願除授自今以後除方鎮外兩巡使及諸司
外巡切加擒捉如有此色具送本司枷禁勘責痛加懲
斷以絕此弊近年以來風俗奢侈本營根本各務誇張
及第登科傾資竭產屋境踰於制度喪葬越於禮儀為
冊使弔贈之臣或爭財貨乞賜章服之類不畏慚羞致
使兒童或輕朝列念茲靡費常行歎嗟委中書門下次
第條疏稍加改革輸其常賦尚慮不充更或加徵其何
以濟近年百姓流散稅錢已多如聞自朝廷用軍有於

百姓正稅外每貫紐四十五文已是數年至今不矜
放黎民冤抑腿脊瘡疾所徵錢財將充諸色支分所添
兵則逐月銷減每思此事深可嘆傷其天下緣用軍奏
加紐貫錢更有敢徵一文其長吏及判官錄事叅軍並
准入已贓仍不在以官贖之限其鄭州唐道尉在任日
加徵稅錢如或却徵亦依此例衡鏡之司去留雖切念
其羈寓須與商量支部選人如聞累年駁放至多或文
狀舛錯或書判差遲有司守文不得不爾況選人例迫

飢寒方自遠來調集頻年被駁情實可矜既遇鴻恩合與優假委吏部檢勘去冬選人若有此色除身非名踰濫及欠選欠考外並以比遠殘缺取其情願者特與却收注擬諸道奏官奏者緣要缺舊人不理從今後并須分明具不理罪儘先加懲責有罪空替則是惠姦其奏前資及見任多有虛監頭銜用錢計會從今以後有官更奏者便仰兼遞告至進奏院以憑點檢如告身不到不在奏行其虛銜所奏只與九品初任仍奏狀內須是

三代官諱及鄉貫戶頭年幾餘各依資奏請河北三道
不在此限守土長人切資士族品流混雜必害生靈刺
史縣令如是本州百姓及商人等准元勅不令任當處
官不繫高下益以事體不可兼又十室九親多有憎愛
一切阻碍公事難行近年此色至多各仰本道遞相檢
察當日勒停百姓商人亦不合為本縣鎮將若有違越
必舉典刑裨補除任實在獎勞奏請繁多則為過濫咸
通七年赦書條疏諸州府奏軍將官不許除上佐如有

功須獎卽於本管內除授仍不得占優原處近日諸道
不守條章或分兩三度奏來所貴前後不相見但行計
會貴得人多後從自後諸道軍將官並限七月表到京
令之初行宜武臣之叙進據所合奏人數一表令如有
別勞効者卽待明年七月不得兩度貴行欺隱忠臣社
稷誓著山河或盟府書勲或闕宮配食宜舉賞延之典
用彰義烈之名故尚父汾陽王贈太師子儀贈太尉秀實
贈太師晟贈司徒顏杲卿太師真卿許遠張巡南霽雲

子孫中未甄獎者每家與一人正員官安金藏操行中
節實異等倫合為酬庸以勸義士如有子孫與一人正
員官武德以來配享功臣名迹尤著節義顯聞子孫凌
替官闕廢墜未經甄錄者委中書門下搜訪嗣肩量加
優獎慶連宗室義重維城洎文武羣僚恪恭事務用酬
勞績宜降恩私亞獻撫王紘榮王情等各賜物一百疋
夾侍正衣進珪捧珪各賜物五十疋亞獻終獻正衣各賜
物四十疋大長公主嗣王郡主縣主各賜物内外文武

見任及致仕官三品以上賜爵一級四品以下加一階
合入三品五品欠者未合叙考者待考足日聽封叙孔
聖之後未加虞賓之恩或表崇儒以明繼絕文宣王之
後及二王三恪各與一子官其祠廟委所司量加修飭
義在奉親道惟睦族將申孝敬合示恩榮皇五等以上
親三品以上賜爵一級五品以上加一階六品以下及
前資常選散官簡選日優與處分未有出身備位者准會
昌五年正月三日敕書處分應陪位皇五等以上親三

品以上賜爵一級四品以下加一階親四等並諸色陪
位者五品以上加一階六品以下各白衣並賜勲兩轉
其前資及後出身各減一選皆懷追養之願盡有榮終
之心授任封崇式光存歿常叅官及諸州府長官父母
見在未有官封者並量與五品致仕及階并邑號如有
官者量與進改如官已至五品以上者即與五品階父
母亡歿未經追贈者量與追贈及邑號任榮輔相寄重
藩方洎於親軍咸秉忠節俾令追贈以顯榮中書門下

及節度使帶平章事者各與一子八品正員官祖父母
父母亡歿各與追贈已經追贈者更與追贈節度使與
一子正員九品官東都留守度支鹽鐵使觀察處置都
團練防禦經畧招討使皇城留守各與一子出身先亡
歿未追贈者各與追贈虔奉典章肅供祀事宜覃渥澤
以獎勞能禮儀使大禮使京兆府尹各與一子正員九
品官應郊廟升壇行事官溥恩外中書門下尚書省御
史臺三品以上特加一階四品以下各加一階如入三

品者量減三考入四考者量減三考入五品者量減兩
考仍待考足日聽叙其合選人與減一選內行事者官
三品以上賜爵一級四品以下更加一階內侍省及內
坊官四品以上各賜勳五轉五品以下各賜勳三轉應
從駕至郊廟者溥恩之外三品以上賜爵一級四品以
下各加一階白衣賜勳兩轉位列牙爪職掌警衛念其
宣力宜加醕勞

唐大詔令集卷七十二